



## Speech – Hon. La’aulialemalietoa Leuatea Polataivao Fosi Schmidt Human Rights Day 2025

---

### Talofa,

Mapu ane ia i Niafane ma lafo le Taula o mālolo e pei o le fetalaiga i le Manu’a le Sagalala. E fa’atulou atu Samoa i ou Pa’ia ma Mamalu e lē avea mai lava i le Oneone e le Utufia o le Tui-Manu’a, se’ia pa `ia Fili ma Puletu’u na tauilo ai pou o Malo.

E matua le tu’u i le aufaigaluga Totofi a le Atua i Tovine e fia, o lo’o fa’anono ai manuia auā Samoa ma le lumana’i. Leitioa fai mai le mavaega a le Malietoa, Samoa e, o le a tao-ama ia ou pa’ia, ae o le a matau mea uma i le Atua ma le Tala Lelei. Tulou Tulouna lava.

“O le Autū mo lenei faamoemoe **O `Aia Tatau a Tagata: E Taua i le soifuaga o Aso Ta’itasi’**, ua avea lava o se fa’amanatu, o Aiā Tatau e lē o ni fa’aupuga po’o ni mafaufauga mai atunu’u i fafo; peita’i o i’inei o lo’o afifi ai le fa’avae o ō tatou olaga mo aso ta’itasi, o le fa’ata’imuaga o le soifua a’oa’oina, soifua galue, fegalegalea’i ma le fausia o mafutaga e amanaia, tagata uma.”

O le aso 10 o Tesema 1948, na sainia ai le Feagaiga Fa’avaomalo o Aiā Tatau a Tagata Soifua o le Lalolagi (UDHR), ma avea ai ma ta’utinoga fa’avaomalō i le amanaiaina o le:

- **Tamali’iaga o Tagata**
- **Ia Tulaga tutusa Aiā Tatau a tagata uma** e tusa lava pe eseese ...

- **Lanu & Ituaiga,**
- **Itupā,**
- **Lotu ma Tapuaiga,**
- **Gagana,** po o ni
- **Tulaga mamalu ma le Tamao'aiga.**

O le 1950, na 'atofaina ai e le Fono Aoao a Malo Aufa'atasi, mo Samoa ma isi sui auai, le aso 10 o Tesema i tausaga ta'itasi e fai ma aso fa'amanatu mo Aiā Tatau a Tagata.

O le fa'amanatuina o lenei aso, o se laolao lelei mo le fa'afouina o la tatou ta'utinoga ma patipatia ai matati'a ua 'ausia aemaise le fa'asauni atu mo galuega o lo'o fotua'i mai o tatou luma.

E o gatasi le Autū ma poutū mulimuli e lua o le **Ta'utinoga i Apia** (*Apia Declaration*) lea na fa'ai'ugafonoina i le Fonotaga a Fa'alapotopotoga o Aiā Tatau a Tagata o Malō o le Taupulega (CFNHRI) na faia i Samoa i Apia, i le 2024.

O lo tatou avea o 'Aiā Tatau, ma ni vaega taua o le soifuaga o aso uma' o lo tatou fa'amautūina foi lea o le:

- **Poutū 3:** *Tamāoaiga Mautū e lagolago i le Toe Fuata'ina ma Atina'e manuia.*

Ua feagai ma si'omia i tatou ma le mau faafitauli. O faiga fa'ailoga lanu ua le gata i le fa'a-lotoifale, ae o le va o atunu'u o lo'o fa'atupula'ia pea. O le tulaga ogaoga o le tamaoaiga ua a'afia ai isi ae o lo'o 'ae'ae ma e foliga mai e lilifa le tele o le tamaoaiga i isi. O le fa'aleagaina o le si'osi'omaga o lo'o mafua mai i le lē gafataulimaina talafeagai o le fa'aaogāina ma le gaosiga o oloa talu ai suiga o le

tau. O pine fa'amau ma fa'amanatu ia e iloa ai, e lē o ō fa'atasi le tatou tamaoaiga mo le soifua lelei o tatou tagata ma le lalolagi.

O se "tamaoaiga e amanaia Aiā Tatau a tagata" e aofia ai le fa'aaogāina o malosi'aga o le Malō e faia ai fa'aiuga-tau-tupe mo le una'iina o a'oa'oga mo tagata lautele, mo le soifua maloloina, puipuiga lautele ma isi Aiā Tatau ma fa'atinoga talafeagai e fa'aitiitia ai le fa'aitu'au ma le fa'ailoga tagata. E aofia i'inei le fausiaina o ni ālafua e amana'ia, manino ma mafai ai ona tali atu, ina ia maua saofagā ai tagata lautele i fa'amaumauga ma fa'amatalaga. Ia avea le Aiā Tatau a tagata e mamanuina ai fa'avae fa'a-le-tamaoaiga aemaise le tulaga o Aiā Tutusa i puna'oa e mana'omia mo le amana'iaina o Aiā Tatau a tagata uma.

O i'inei fo'i o lo'o ave i ai le fa'amuamua a lo tatou Malō.

O le faamautuina o Aiā Tatau ia tatou galuega faatino o le soifuaga o aso uma e mausali ai se siosiomaga e uunaia tagata ta'ito'atasi ina ia maua se soifuaga filemu ma se soifuaga ua ta'uaogaina.

O feagaiga ma Tulafono Fa'ava-o-Malō mo Aiā Tatau ua fa'avaeina i luga o tulaga aloaia e pei o faiga tutusa; o le lē fa'ailoga tagata; o le amanaia; o le mafai ona tali atu; fa'apea le usita'ia o Tulafono. O nei faiga fa'avae e tāua tele mo le faafaileleina o se siosiomaga amiotonu, e faavae i faiga tutusa ma le fetu'utu'una'i mo tagata uma.

E tatau ona tatou manatua o Aiā Tatau ua lē na o ni tiute po'o matafaioi fa'aletulafono, ae galuega faatino nei a le tagata Samoa i lona soifuaga o aso uma, e e pei o le:

- Tausiaina o a tatou matua ma tuaā;

- A'otauina o a tatou fanau;
- Taumafa ile suavai mamā ma mea taumafa maloloina
- Agavaa i galuega mautu ma totonu talafeagai
- Amanaia o tagatanu'u i mataupu e a'afia ai lo latou soifua.

O se mitamitaga mo i tatou ona ua alo'ai'a ma ofi Aiā Tatau a tagata i totonu o a tatou tulafono, faiga fa'avae ma ta'iala mo fa'alapotopotoga. O ni isi foi o atina'e a le Faiga Malō i le taimi nei, e aofia ai le poloketi miliona Talā sa faavaeina mo le faamoemoe o le atina'eina o le soifua manuia lautele o nu'u ma itumalo. O leni anavatau ua fa'usiaina ai fale a'oga Fa'aitumalo; o maota gasegase, ma toe fa'afouina ai mata'aga i itumalo mo tupe maua e pei o vaita'ele; o nofoaga fa'asao, ma isi. O nei taumafaiga e 'auga tonu i le fa'aitiitia o tulaga lē tutusa o tamaoaga.

E lē natia a'afiaga o lo'o i ai ni isi e vaivai le tamaoaga, i latou e i ai a'afiaga tumau o le soifua, tinā, ma fanau-iti, aemaise fo'i mafutaga i nu'u i tua o lo'o feagai pea i latou ma le mau fa'afitauli. O le tiute o le Malō ma le atunu'u, ia mautinoa o lo'o amana'ia o latou Aiā Tatau ma finagalo i aso uma.

Ao tatou faamanatuina le Aso fa'apitoa mo Aiā Tatau, o se avanoa fo'i lea tatou te patipatia ai taumafaiga a alo ma fanau; tupulaga talavou; o sui auai ma fa'alapotopotoga ua āfu le tautua, e ala atu ia latou galuega fa'atino i le puipuia ma le fa'alauiloina o Aiā Tatau.

O le talitonuga, o Aiā Tatau e lē na'o ni upu fa'alalanu ma'ave'ave e na o le tasi i le tausagana fa'alagilagi ma taulagi, ae o se punavai-ola mo se Samoa e fai mea tonu ma amanaia tagata uma. O a tatou fa'ai'uga fai, o tulafono ma ta'iala uma aemaise le soifua fealoaloa'i ma fetausi'ai, o le a atagia ai le tamali'i'aga ma lo

tatou amana’iaina o Aiā Tutusa ua fusia ai i tatou. Ia atagia ia tatou tu ma aga i aso ta’itasi, ina ia mautinoa e a tatou fanau; matua tausi; ma tagatanu’u uma le taūa o Aiā Tatau ia a’oa’oina; ia soifua maloloina, ia saofagā i avanoa tutusa, ma le tausisia o le va fealoaloa’i.

O le fusi-o-malō ia susulu malamalama ma fale i le manino le va fealoalo’ai o tagata ma le mamalu o le atunu’u, e mafai ai ona tatou fausia ma tatou velo `aso fa’atasi mo se Samoa, e le gata ina atagia i lana Gagana le Aiā Tatau—ae ia silisili fo’i ona soifua ai, i aso uma.

Manuia tele le Fa’amanatuina o le Aso Fa’apitoa mo Aiā Tatau.

Soifua